

VENDIM
Nr. 408, datë 15.7.2025

**MBI MIRATIMIN E RREGULLAVE PËR KRITERET DHE PROCEDURAT E
KRIJIMIT TË SEKSIONEVE DHE TRUPAVE GJYKUES**

Këshilli i Lartë Gjyqësor, bazuar në nenet 147, pika 1, dhe 147/a, pika 1, shkronja “ë” të Kushtetutës së Republikës së Shqipërisë; nenin 23, pika 7, të ligjit nr. 98/2016, “Për organizimin e pushtetit gjyqësor në Republikën e Shqipërisë”, si dhe nenet 61, pika 2, shkronja “ë”, 97, pika 1, shkronja “c”, të ligjit nr. 115/2016, “Për organet e qeverisjes së sistemit të drejtësisë”, me propozim të Komisionit të Planifikimit Strategjik, Administrimit dhe Buxhetit,

VENDOSI:

Neni 1
Objekti

Objekt i këtij vendimi është përcaktimi i kriterëve dhe procedurës të krijimit të seksioneve, caktimi i gjyqtarëve në seksione dhe trupa gjykues në Gjykatën e Lartë, si dhe gjykatat me juridiksion të përgjithshëm të shkallës së parë dhe të apelit.

Neni 2
Qëllimi

Qëllimi i këtyre rregullave është krijimi i kushteve për specializim të trupës gjyqësore në funksion të rritjes së profesionalizmit, dhënies së drejtësisë pa vonesë, si dhe rritjes së besimit të publikut në sistemin gjyqësor.

Neni 3
Parimet

1. Krijimi i seksioneve në gjykata realizohet në respektim të parimit të pavarësisë, procesit të rregullt ligjor, aksesit në drejtësi, sigurisë juridike, transparencës, profesionalizmit, fleksibilitetit dhe lëvizshmërisë të trupës gjyqësore, efikasitetit dhe objektivitetit.

2. Ndarja në seksione realizohet nëpërmjet gjetjes së një ekuilibri të drejtë midis nevojës për specializim të gjyqtarit si pjesë e trupës gjyqësore, ushtrimi i të drejtës për zhvillimin e karrierës së magistratit dhe garantimit të funksionalitetit dhe mbarëvajtjes së punës në gjykatë.

Neni 4
Specializimi i trupës gjyqësore

1. Specializimi i gjyqtarit/trupës gjyqësore mundëson marrjen/fitimin e njohurive dhe aftësive të thelluara brenda një fushe apo nënfushe specifike të së drejtës.

2. Në gjykatat në të cilat nuk është e mundur sipas ligjit të krijohen seksione, gjyqtarët e specializuar për shqyrtimin e çështjeve penale me të mitur në konflikt me ligjin ose të mitur viktimë nga vepra penale, gjykojnë çështje në përputhje me kreun III, pika 11, të vendimin nr. 554, datë 29.12.2022, të Këshillit të Lartë Gjyqësor për ndarjen me short të çështjeve gjyqësore.

Neni 5
Krijimi i seksioneve

1. Këshilli i Gjykatës, pas marrjes së mendimit të Mbledhjes së Përgjithshme të Gjyqtarëve, vendos për krijimin e dy ose më shumë seksioneve në gjykatë, me vendim të arsyetuar.

2. Seksioni i gjykatës përbëhet nga së paku 6 gjyqtarë.

3. Vendimi për krijimin e seksionit i njoftohet menjëherë Këshillit të Lartë Gjyqësor.
4. Vendimi i Këshillit të Gjykatës botohet në faqen zyrtare të internetit të gjykatës.

Neni 6

Kriteret për krijimin e seksioneve

1. Vendimi për krijimin e seksionit, bazohet në analizën tërësore të kriterëve objektive të përcaktuara në pikën 2 të këtij neni.
2. Konsiderohen kriterë objektive:
 - a) numri i gjyqtarëve që ushtrojnë funksionin efektivisht në gjykatë;
 - b) lloji i çështjeve;
 - c) numri i çështjeve të regjistruara në të paktën tri vitet e fundit;
 - d) ngarkesa e gjyqtarëve;
3. Në çdo rast në krijimin e seksioneve, Këshilli i Gjykatës merr në konsideratë efektet e ndryshimeve në legjislacionin material dhe procedural, dhe të administrimit gjyqësor që rrisin efikasitetin dhe cilësinë e drejtësisë.

Neni 7

Seksionet në gjykatën e shkallës së parë të juridiksionit të përgjithshëm

1. Gjykatat e shkallës së parë të juridiksionit të përgjithshëm organizohen dhe funksionojnë në seksione.
2. Ndarja në seksione nënkupton ndarjen, por pa u kufizuar vetëm në, seksionin civil dhe penal, tregtar, familjar etj., sipas fushave të veçanta të së drejtës.

Neni 8

Seksionet në Gjykatën e Apelit të Juridiksionit të Përgjithshëm

1. Gjykata e Apelit të Juridiksionit të Përgjithshëm organizohet dhe funksionon në seksione.
2. Ndarja në seksione nënkupton ndarjen, por pa u kufizuar vetëm, në seksionin civil dhe penal.

Neni 9

Seksionet në Gjykatën e Lartë

Rregullat për krijimin e Seksioneve (Kolegjeve) të Gjykatës së Lartë, zbatohen parashikimet e ligjit 98/2016, “Për organizimin e pushtetit gjyqësor në Republikën e Shqipërisë”, i ndryshuar.

Neni 10

Caktimi i gjyqtarit në seksion

1. Këshilli i Gjykatës vendos caktimin e gjyqtarit në seksionin përkatës, në përputhje me nevojat e gjykatës dhe pas marrjes së mendimit të gjyqtarit.
2. Si rregull, caktimi i gjyqtarit në seksion bazohet në vlerësimin tërësor të kriterëve të mëposhtme:
 - a) përvoja profesionale që lidhet me natyrën e çështjeve të gjykuara;
 - b) fusha e interesit të gjyqtarit;
3. Në rastin e procedurës së lëvizjes paralele, transferimit të përkohshëm apo ngritjes në detyrë sipas ligjit, Këshilli i Gjykatës cakton në seksion gjyqtarin e transferuar nëpërmjet lëvizjes paralele, transferuar përkohësisht apo ngritur në detyrë, në përputhje me vendimin e Këshillit të Lartë Gjyqësor që specifikon fushën përkatëse të së drejtës.
4. Përjashtimisht nga rregullat e parashikuara në pikat 1, 2 dhe 3 të këtij neni, caktimi në seksion mund të kryhet nga Këshilli i Gjykatës, me vendim të arsyetuar, pavarësisht mendimit të gjyqtarit, për arsye objektive që lidhen me garantimin e funksionalitetit, mbarëvajtjes së punës në gjykatë dhe

trajnimet e kryera brenda dhe jashtë vendit për një fushë të caktuar të së drejtës për të cilat konsiderohet gjyqtar i specializuar.

Neni 11

Caktimi i trupave gjykues në seksione

1. Këshilli i Gjykatës vendos për krijimin, caktimin e gjyqtarëve në seksione dhe përbërjen e trupave gjykues për çdo seksion në gjykatë, me vendim të arsyetuar.

2. Këshilli i Gjykatës sigurohet që trupi gjykues të ketë përbërje të tillë që garanton balancën ndërmjet përvojave profesionale të anëtarëve dhe fushën e tyre të interesit.

Neni 12

Ushtrimi i funksionit në seksion

1. Këshilli i Gjykatës, me qëllim garantimin e shpërndarjes së ngarkesës së barabartë ndërmjet gjyqtarëve, brenda njëres prej fushave të së drejtës civile ose penale, gjyqtari mund të shqyrtojë çështje të një seksioni të ndryshëm nga ai ku është caktuar, por gjithmonë brenda së njëjtës fushë të së drejtës ku bën pjesë seksioni.

2. Këshilli i Gjykatës, me qëllim garantimin e shpërndarjes së ngarkesës së barabartë ndërmjet gjyqtarëve, jashtë seksioneve sipas fushës së të drejtës civile ose penale, mund të caktojë përkohësisht, me vendim të arsyetuar, që një gjyqtar i caktuar në një seksion të shqyrtojë çështje të një seksioni të ndryshëm nga ai ku është caktuar, edhe jashtë fushës së të drejtës së seksionit përkatës.

Neni 13

Ndryshimi i seksionit

Këshilli i Gjykatës, pas marrjes së mendimit të Mbledhjes së Përgjithshme të Gjyqtarëve, me qëllim garantimin e funksionalitetit dhe mbarëvajtjes së punës në gjykatë, të drejtës së zhvillimit të karrierës dhe specializimit të magistratit, në respektim të parimit të fleksibilitetit dhe lëvizshmërisë së trupës gjyqësore, në përputhje me nevojat e gjykatës, vendos ndryshimin dhe kalimin e gjyqtarit nga një seksion në një tjetër brenda të njëjtës gjykatë.

Neni 14

Shkrirja e seksionit

1. Këshilli i Gjykatës, pas marrjes së mendimit të Mbledhjes së Përgjithshme të Gjyqtarëve të gjykatës, me vendim të arsyetuar, vendos shkrirjen e seksionit në gjykatë.

2. Vendimi për shkrirjen e seksionit, bazohet në analizën tërësore të kriterëve objektive, të lidhura me:

a) ndryshimin e llojit dhe numrit të çështjeve;

b) ngarkesën e gjyqtarëve.

3. Vendimi për shkrirjen e seksionit i njoftohet menjëherë Këshillit të Lartë Gjyqësor.

4. Vendimi i Këshillit të Gjykatës botohet në faqen zyrtare të internetit të gjykatës.

5. Këshilli i Gjykatës, në çdo rast, merr në konsideratë efektet e ndryshimeve në legjislacionin material dhe procedural, si dhe praktikën e mira të administrimit gjyqësor që rrisin efikasitetin dhe cilësinë e drejtësisë.

Neni 15

Dispozita tranzitore

1. Këshilli i Gjykatës, brenda 3 muajve nga hyrja në fuqi e këtij akti, merr masa për plotësimin e kriterëve të trupës gjyqësore pranë një seksioni, në përputhje me përcaktimet e këtij vendimi.

2. Për efekt të ndryshimeve të seksioneve në zbatim të pikës 1 të këtij neni, nuk mund të zbatohet rindarja e çështjeve gjyqësore në gjykatat e shkallës së parë të juridiksionit të përgjithshëm.

3. Ngarkohet Departamenti i Administrimit të Gjykatave dhe Teknologjisë së Informacionit pranë Këshillit të Lartë Gjyqësor për kryerjen e procedurave dhe zhvillimeve të nevojshme në sistemin e menaxhimit të çështjeve, me qëllim pasqyrimin e seksioneve, trupave gjykues dhe caktimin e gjyqtarëve në seksione.

Neni 16

Hyrja në fuqi

Ky vendim hyn në fuqi me botimin në Fletoren Zyrtare.

PËR KËSHILLIN E LARTË GJYQËSOR
KRYETAR

Ilir Rusi